



UPA2020 tikitsinnagu uangut politikerit mingutsitsinnginnerunissamut silallu pissusaanik allanngortitsinnginnerusussanik iliuusissatsinnut innersuussisussamik suleqatigiisitamik immikkut ilisimasalinnik inuttalimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Innersuussinerit tamarmik immikkut imaqassapput aningaasatigut kingunerusussanik inuiaqatigiinnut aamma innuttaasunut/sullivinnut.
(Inatsisartunut ilaasortaq Steen Lyngø, Demokraatit)

Steen Lyngø siunnersuutinnut qujanaq. Siunertaatut allaatigisat tapersorsorparput.

Tapersorsorparput kialluunniit takusinnaammagu mingutsitsinnginnerunissamut silallu pissusaanik allanngortitsinnginnerunissamik piaartumik tigussaasumillu takussutissartalimmik iliuuseqarnissarput isiginngitsuusaasagutsigu tamanna akisussaaffimmik qimarratiginninnerussammat.

Iliuuseqarnissatsinnut innuttaasut piumasaqarput. Upernaap ingerlanerani inuusuttorpassut isummaminnik nittarsaassippat qinikkanut piumasaqarlutik silap allanngoriartorneranut illuatungiliisinnaasunik iliuuseqaqqusillutik. Nunatsinniinnaanngitsoq aammali nunarsuup sinnerani taamaaliorput.

Nersualaartariaqarpaguttaaq namminneq piumassutsiminnik iliuuseqartut Plastic No So Fantastic Facebook aqquutigalugu plastikimut taarsiunneqarsinnaasunik siunnersuuteqarnissamut kikkunnik tamanik periarfissiisut, taamaasilluni pinngortitamut imartatsinnullu siaruaatsitagut plastikkit annikinnerulersinnissaannut aqquutissiuuseqataallutik.

Innuttaasunit namminnermit aallaaveqartumik iliuuseqartoqarnissaanik saqqummiunneqartartut – aamma – ersarissisilluinnarpaat allannguinnissamut iliuuseqarnissamullu inatsisitigut pisinnaatitaaffeqartut piaartumik malugineqartussanik qanoq iliuuseqartariaqarnerannik.

Taamaammat tupigusunnarpoq assigiinngitsutigut periarfissagut atorlugit iliuuseqajaarnissamut Naalakkersuisut tunuarsimaarmata.

EU-p aalajangerpaa plastikiniq nioqqutissat ataasiarlugit atortakkat tuniniarneqarnerat 2021-miit EU-mi tamarmi inerteqqutaalissasoq. Paasiuminaappoq Naalakkersuisut tunuarsimaarmata tamatuma Nunatsinni aamma atuutilernissaannut tunuarsimaarpasimmata.

Eqqaavissuaqarnikkut suliassaqartugut sumiiffinni inoqarfiusuni amerlanerani ersarilluinnarpoq. Qaqqullit Kitaaniittut 2016-imi misissuiffigineqartut 31 procentiisa 39 procentiisalu akornanniittut aqajarui plastikkit nassaarineqarpoq 0,1 annertunerupput. Plastikkit taakku sananeqaataasa paasinarsisippat timmissat aqajarormiui tassaannerusut plastiskit imartani sarfamik siaruarsimasut.

Qassutaarsiutit ukiorpassuarni iliuuseqarfigineqaratik aalisagaqassutsimut pitsaanngitsumik sunniuteqarsimanerat, sunniuteqarnerat sulilu sunniuteqarnissaat aalisartut namminneq aamma ernumassutigaa.

Immap naqqanik akornusiinani imartami Østersø-mi aalisarnermi atortut annaaneqartut qallornissaannut atatillugu taamaaliornermi avatangiisit qanoq sunnerneqarsinnaanerannut misissuineq ingerlanneqarsimasoq isumassarsiorfiulluarsinnaavoq. Qassutaarsiutit immami uumasooqassutsimut taamalu aamma aalisarnermut pitsaanngitsumik sunniuteqartut qallornissaat avatangiisinik akornusiinani qanoq ingerlanneqarsinnaanersoq nunani allani misilittakkat iluaqutigalugit periarfissarsiuussinnaavarput.

Pingaartumik silap issinnerata nalaani biilit inoqanngitsut ikumatiinnarneqartut takornartaanngillat. Biilit uninngasut motoriisa ingerlatiinnarnerisigut silaannarmut aniatittagarput nammineq isitsinnik annikiginarsinnaagaluartoq tamarmik sunniuteqartarput.

Umiarsuit takornariartaassuit talittarfimmiinnerminni maskiinaasa ingerlatiinnartariaqartarnerat silaannamik mingutsitsinermik pilersitseqataasarmat nutaarsiassaangilaq.

Silap allanngoriartornerata sukkasuumik malunniukkiartorneranut kingaallassaaqataasinnaasunik siunertalinnik aalajangersagaqartoq ilisimavarput. Taakkuli sunniutaat aqaguagu aappaaguluunniit malugissagigut ilimaginngilara.

Aqaguagu aappaguluunniit malugisinnaasatsinnik aalajangersaanissamut Naalakkersuisut sapiissuseqarpat? Innuttaasut tamatumunnga noqqaassuteqarput, apeqqutaavorli Naalakkersuisut tamatumunnga peqataanissamut piumassuseqarnerisut.

Piumassuseqarnissaat neriuutigivarput.